

Uunga siunnersuut: Oqaasiliortut pillugit Inatsisartut inatsisaat nr. xx, xx. xxx 2017-imeersoq
(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Saqqummiussissut

Siullermeerneqarnera

Naalakkersuisut sinnerlugit Oqaasiliortut pillugit Inatsisartut inatsisissaattut siunnersuut matumuuna saqqummiuppara.

Kalaallisut oqaatsivut inuiaqatigiinni qitiusumik kulturimut tunngavittut inissisimapput, ilutigisaanillu tassaallutik attaveqatigiinniarnitsinni sakkut pingaarnersaat. Taamaammattaaq pingaartuuvoq, ullutsinnut naapertuuttumik inatsisiliorneq aqputigalugu, oqaatsitta qanoq ataavartinnissaat, siuarsarnissaat patajaallisarnissaallu pillugit sinaakkusiinissarput. Tamannaavorlu siunnersuutip matuma pingaarnertut siunertaa.

Siunnersuutip malittarisassat atuutereersut annertuutigut ingerlateqqillugillu erseqqissarpai. Taamaattoq aamma siunnersuummi allannguuteqarlunilu nutaartaqarpoq. Uanilu pingaarnertit erseqqissassavakka.

Pingaartilittut nutaartaavoq Oqaasiliortut kalaallisut oqaatsit nutaat, oqaatsit ilusaat oqariaatsillu akuerisarunnaassammagit. Oqaatsit ingerlaavartumik allanngoriartortarput, oqaatsit nutaat pilersarnerisigut, atortuarneqarnerisigut tassuunakkullu oqaatsinut ilaalernerisigut. Taamaammatt siunertamut naapertuuttutut isigineqarpoq inatsisiliorneq aqputigalugu, paarlaallugu Oqaasiliortut piginnaatitaaffiisa, Oqaasiliortut kalaallit oqaasiisa inerikkiartornerannik malinnaanissaannut saatinneqarnissaasa qularnaarnissaat, tamatumunnga ilanngullugu kalaallisut oqaatsit nutaat, oqaatsit ilusaasa, oqariaatsit oqaasersiallu katersorneqarlutillu nalunaarsorneqarnerisa ingerlaavarnerat.

Ilutigisaanik siunnersuummi aalajangersarneqarpoq, Oqaasiliortut oqaatsit allamiut oqaasiinut ilaasut kalaallisut taaguusersortassagaat. Kalaallisut taaguutsit taamaattut taaneqartarput taarsiullugu oqaasilianik. Kalaallit oqaasii patajaallisarumallugit pingaartinneqarpoq taarsiullugu oqaasiliat pilersinneqarnissaasa qularnaarnissaat, taamaaliornerup oqaatsit nutaat kalaallit oqaasiinut ilaalertissammagit, tassuunakkullu oqaatsit amerliartorlutillu inerikkiartornissaannut tapertaalluni. Oqaasilerisut aammattaaq oqaatsit suliamut tunngasut akuersissutigisassavaat, tamatumunnga ilanngullugit suliaqarfinni aalajangersimasuni oqaatsit oqariaatsillu suliamut tunngasut. Oqaatsit suliamut tunngasut akuersissutiginerat pisassaaq, suliamik ilisimasallit suleqatigiit, Oqaasiliortut pilersitaasa inassuteqareernerisigut. Pingaartuuvoq oqaatsit suliamut tunngasut assigiiartumik akuerisaasumillu taaguuteqartinnissaat.

Siunnersuummi aammattaaq aalajangerneqarpoq, Oqaasiliortut allattaatsip aalajangerniarneranut atatillugu, tunngaviit pingaarnert allattaatsimi aallaaviusussat aalajangersartassagaat. Tamanna pingaartutut isigineqarpoq, tassuunakkut Oqaasiliortunit, pisortanit tamanillu allattaatsip aalajangiunniarneranut sinaakkutitut suut aallaaviusarnerisa ilisimaneqarnissaat qularnaarneqassammat.

Aammattaaq nutaatut aalajangerneqarpoq, pisortatigoortumik kalaallisut allattaaseq, taarsiullugu oqaasilianut aamma oqaatsinut suliamut tunngasunut atatillugit oqaatsit aalajangiussat atornissaat, pisortat ingerlatsiviini tamani pisussaaffiussammat. Tamanna ilanngunneqarpoq qularnaarumallugu, allattaatsimi malittarisassat maleruarneqarnissaat, aamma taarsiullugu oqaasiliat taaguutillu aalajangiussat inuiaqatigiinni immikkoortunit amerlanerpaanit atorneqartarnissaat, tamatumalu pisortat ingerlatsiviinit maleruarneqarnissaa.

Nutaaliornerit pingaarutilittut kingulliullugu taajumavara, maanna Oqaasiliortut ataatsimut isigalugit, aamma ilaasortanut ataasiakkaanut naleqqiullugu, piginnaasassatigut piunasaqaatit ilanngunneqarmata, aamma Oqaasiliortunit ilaasortat Naalakkersuisunit toqqarneqartassammata, suliffiit kattuffiillu siunnersuummi taaneqartut inassuteqareernerisa kingorna.

Taamaalilluni siunnersuut immikkuualuttunik pitsaasorpassuarnik ilaqarpoq, taakkualu ataatsimut nassatarissavaat kalaallit oqaasiisa ataavartinniarnersisa ineriartortuarnerisalu patajaallisarneqarnerat.

Taamatut oqaaseqarlunga siunnersuut Inatsisartunit inussiarnersumik suliarisassannortippara.